

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савет

Rješenje

**Prijava koncentracije privrednog subjekta „Neftegazojava Innovacionnaja Korporacija,
Moskva, Ruska Federacija i privrednog subjekta „Naftna industrija Srbije“ a.d., Novi
Sad, Republika Srbija**

Sarajevo, maj 2011. godine



Broj: 02-26-1-031-19-II/10
Sarajevo, 26. maj 2011. godine

Na osnovu člana 25. stav (1) tačka e), člana 42. tačka d), u vezi s čl. 12., 14., 16., 17. i 18. i člana 48. stav (1) tačka e) Zakona o konkurenciji („Službeni glasnik BiH“, br. 48/05, 76/07 i 80/09), a rješavajući po zajedničkoj Prijavi koncentracije privrednog subjekta Otvorenog akcionarskog društva „Neftegazojava Innovacionnaja Korporacija“, Kalančevskaja ulica broj 11, zgrada 2, 107078 Moskva, Ruska Federacija i privrednog subjekta Društva za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa „Naftna industrija Srbije“ a.d., Narodnog Fronta 12, 21000 Novi Sad, Republika Srbija, zaprimljenoj dana 30. decembra 2010. godine pod brojem: 02-26-1-031-II/10, Konkurencijsko vijeće, na 14. (četnaestoj) sjednici održanoj dana 26. maja 2011. godine, je donijelo

R J E Š E N J E

- (1) Ocjenjuje se dopuštenom koncentracija na tržištu istraživanja i proizvodnje nafte i gasa u Republici Srpskoj, koja je nastala osnivanjem privrednog subjekta „Jadran – Naftagas“ d.o.o. za istraživanje i proizvodnju nafte i gasa, Ivana Frane Jukića 7, 78000 Banja Luka, Bosna i Hercegovina, zajedničkim dugoročnim ulaganjem privrednih subjekta Otvoreno akcionarsko društvo „Neftegazojava Innovacionnaja Korporacija“, Kalančevskaja ulica broj 11, zgrada 2, 107078 Moskva, Ruska Federacija i Društvo za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa „Naftna industrija Srbije“ a.d., Narodnog Fronta 12, 21000 Novi Sad, Republika Srbija.
- (2) Zbog provođenja koncentracije prije donošenja rješenja Konkurencijskog vijeća o usklađenosti koncentracije iz čl. 12. i 14. Zakona o konkurenciji, izriče se novčana kazna privrednom subjektu Otvorenom akcionarskom društvu „Neftegazojava Innovacionnaja Korporacija“ Moskva, Ruska Federacija i privrednom subjektu Društvu za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa „Naftna industija Srbije“ a.d., Novi Sad, Republika Srbija u visini od 70.000,00 KM (sedamdesethiljada), koju su dužni platiti u roku od 8 dana od dana prijema ovog Rješenja.

U slučaju da se izrečena novčana kazna ne uplati u navedenom roku obračunat će se zatezna kamata za vrijeme prekoračenja roka, prema važećim propisima Bosne i Hercegovine.

- (3) Novčanu kaznu iz stava (2) će platiti privredni subjekt „Jadran – Naftagas“ d.o.o. za istraživanje i proizvodnju nafte i gasa, Ivana Frane Jukića 7, 78000 Banja Luka ili povezana privredna društva učesnika koncentracije u Bosni i Hercegovini – privredni subjekt „Optima Grupa“ d.o.o. Banja Luka, Kralja Alfonsa XIII 37A, 78000 Banja Luka, privredni subjekt „Rafinerija nafte“ a.d. Brod, Svetog Save bb, 74450 Brod, privredni subjekt „Rafinerija ulja Modriča“ a.d. Modriča, Vojvode Stepe Stepanovića 49, 74480 Modriča, privredni subjekt „Nestrol Petrol“ a.d. Banja Luka, Kralja Alfonska XIII 9, 78000 Banja Luka.

- (4) Ovo Rješenje o koncentraciji se upisuje u Registar koncentracija.
- (5) Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće je zaprimilo zajedničku Prijavu koncentracije (u daljem tekstu: zajednička Prijava), pod brojem: 02-26-1-031-II/10 dana 30. decembra 2010. godine (podnesena preporučenom poštom dana 28. decembra 2010. godine), kojom privredni subjekt Otvoreno akcionarsko društvo „Neftegazovaja Innovacionnaja Korporacija“, Kalančevskaja ulica broj 11, zgrada 2, 107078 Moskva, Ruska Federacija (u daljem tekstu: NeftegazInKor ili Podnosilac prijave) i privredni subjekt Društvo za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa „Naftna industrija Srbije“ a.d., Narodnog Fronta 12, 21000 Novi Sad, Republika Srbija (u daljem tekstu: NIS ili Podnosilac prijave) namjeravaju zajedničkim ulaganjem na dugoročnoj osnovi osnovati novi privredni subjekt „Jadran – Naftagas“ d.o.o. za istraživanje i proizvodnju nafte i gasa, Ivana Frane Jukića 7, 78000 Banja Luka, Bosna i Hercegovina (u daljem tekstu: Jadran – Naftagas).

Uvidom u podnesenu Prijavu Konkurencijsko vijeće je utvrdilo da ista nije potpuna, u smislu člana 30. stav (1) Zakona o konkurenciji (u daljem tekstu: Zakon) i čl. 9. i 11. Odluke o načinu podnošenja prijave i kriterija za ocjenu koncentracije privrednih subjekta („Službeni glasnik BiH“, broj 34/10), te je zatražilo dopunu iste u skladu sa članom 31. Zakona (akt broj: 02-26-1-031-1-II/10 od dana 02. februara 2011. godine, broj: 02-26-1-031-5-II/10 od dana 04. marta 2011. godine i broj: 02-26-1-031-11-II/10 od dana 08. aprila 2011. godine).

Podnosioci prijave su u skladu sa zahtjevom Konkurencijskog vijeća dopunili Prijavu traženom dokumentacijom (podnesak broj: 02-26-1-031-4-II/10 od dana 14. februara 2011. godine, broj: 02-26-1-031-8-II/10 od dana 24. marta 2011. godine i broj: 02-26-1-031-14-II/10 od dana 18. aprila 2011. godine).

Prijemom tražene dokumentacije Konkurencijsko vijeće je utvrdilo Prijavu kompletnom i izdalo Potvrdu o prijemu kompletne i uredne Prijave, u skladu sa članom 30. stav (3) Zakona (akt broj: 02-26-1-031-16 -II/10 dana 27. aprila 2011. godine).

Podnosioci prijave su naveli, u smislu člana 30. stav (2) Zakona, da nemaju obavezu podnijeti zahtjev za ocjenu koncentracije nekom drugom tijelu za konkurenciju izvan teritorije Bosne i Hercegovine.

Konkurencijsko vijeće je izdalo, u skladu sa članom 16. stav (4) Zakona, Obavijest o dostavljenoj Prijavi (akt broj: 02-26-1-031-9-II/10 od 08. aprila 2011. godine) u dnevnoj štampi Bosne i Hercegovine, u kojoj je objavilo podatke o namjeravanoj koncentraciji, te pozvalo sve zainteresovane strane na dostavljanje pisanih komentara u pogledu provedbe iste. Na predmetnu Obavijest nisu dostavljeni komentari zainteresovanih strana.

Konkurencijsko vijeće u postupku ocjene dopuštenosti koncentracije je utvrdilo sljedeće činjenice:

Predmetna Prijava je podnesena blagovremeno, u skladu sa članom 16. stav (1) Zakona.

1. Učesnici koncentracije

Učesnici predmetne koncentracije su privredni subjekt Otvoreno akcionarsko društvo „Neftegazovaja Innovacionnaja Korporacija“, Kalančevskaja ulica broj 11, 107078 Moskva,

Ruska Federacija i privredni subjekt Društvo za istraživanje, proizvodnju, preradu, distribuciju i promet nafte i naftnih derivata i istraživanje i proizvodnju prirodnog gasa „Naftna industrija Srbije“ a.d., Narodnog fronta 12, 21000 Novi Sad, Republika Srbija.

1.1. Privredni subjekt NeftegazInKor

Privredni subjekt Otvoreno akcionarsko društvo „Neftegazovaja Innovacionnaja Korporacija“, Kalančevskaja ulica broj 11, 107078 Moskva, Ruska Federacija, upisan je u Jedinствeni državni registar pravnih lica u Moskvi, dana 02. avgusta 1999. godine pod brojem: 1027708003256, sa osnovnim kapitalom u iznosu od 577.088,00 KM (12.000.000,00 rubalja).

Privredni subjekt NeftegazInKor u većinskom je vlasništvu državnog preduzeća Ruske spoljnotrgovinske asocijacije „Zarubežnjeft“ iz Moskve, koji ima 95,0% vlasničkih udjela.

Pretežne registrovane djelatnosti privrednog subjekta NeftegazInKor su proizvodnja sirove nafte i prirodnog plina, te usluge za proizvodnju nafte i plina.

1.1.1. Povezana društva privrednog subjekta NeftegazInKor

Privredni subjekt NeftegazInKor posjeduje više od 10,0% vlasničkih udjela u slijedećim privrednim subjektima u Bosni i Hercegovini:

- „Optima Grupa“ d.o.o. Banja Luka, Kralja Alfonsa XIII 37A, 78000 Banja Luka - 100,0% vlasničkih udjela;
- „Rafinerija nafte“ a.d. Brod, Svetog Save bb, 74450 Brod – 79,999602% vlasništva;
- „Rafinerija ulja Modriča“ a.d. Modriča, Vojvode Stepe Stepanovića 49, 74480 Modriča - 75,651467% vlasničkih udjela;
- „Nestrol Petrol“ a.d. Banja Luka, Kralja Alfonska XIII 9, 78000 Banja Luka - 80,000031% vlasničkih udjela.

1.1.1.1. Privredni subjekt „Optima Grupa“ d.o.o. Banja Luka

Privredni subjekt „Optima Grupa“ društvo sa ograničenom odgovornošću za trgovinu naftom i naftnim derivatima (u daljem tekstu: „Optima Grupa“), Kralja Alfonsa XIII 37a, 78000 Banja Luka je registrovan u Okružnom sudu Banja Luka, dana 22. avgusta 2008. godine pod matičnim brojem: 1-16709-00, sa osnovnim kapitalom u iznosu od 50.000,00 KM.

Pretežna registrovana djelatnost privrednog subjekta „Optima Grupa“ je trgovina na veliko naftom i naftnim derivatima.

Privredni subjekt „Optima Grupa“ vrši nabavku sirovina za proizvodnju naftnih derivata za povezani privredni subjekt „Rafinerija nafte“ a.d. Brod i privredni subjekt „Rafinerija ulja Modriča“ a.d. Modriča, preradu sirovina i plasiranje naftnih derivata kupcima na tržištu Bosne i Hercegovine, kao i u inostranstvu (www.rafinerija.com).

1.1.1.2. Privredni subjekt „Rafinerija nafte“ a.d. Brod

Privredni subjekt „Rafinerija nafte“ a.d. Brod, Svetog Save bb, 74450 Brod, je registrovan u Okružnom privrednom sudu Doboj (rješenje broj: 085-0-REG-07-000 528 od dana 30. januara 2008. godine) pod matičnim brojem: 85-02-0001-10 (stari broj: 1-4616-00), sa osnovnim kapitalom u iznosu od 262.914.061,00 KM.

Pretežna registrovana djelatnost privrednog subjekta „Rafinerija nafte“ a.d. Brod je proizvodnja naftnih derivata (jedini je proizvođač na teritoriji Bosne i Hercegovine).

Derivati nafte koji se proizvode u privrednom subjektu „Rafinerija nafte“ a.d. Brod su eurodizel (50 PPM), BMB 95, BMB 98, bitumen lož ulje srednje (mazut), lož ulje srednje (do 3% sumpora), lož ulje srednje lako (LUEL), laki bitumen i platformat.

1.1.1.3. Privredni subjekt „Rafinerija ulja Modriča“ a.d. Modriča

Privredni subjekt „Rafinerija ulja Modriča“ a.d. Modriča, Vojvode Stepe Stepanovića 49, 74480 Modriča, je registrovan u Okružnom privrednom sudu Doboj (rješenje broj: 085-0-REG-07-000 536 od dana 29. februara 2008. godine) pod matičnim brojem: 60-02-0007-10 (stari broj: 1-4627-00), sa osnovnim kapitalom u iznosu od 203.487.123,00 KM.

Pretežne registovane djelatnosti privrednog subjekta „Rafinerija ulja Modriča“ a.d. Modriča su proizvodnja ulja i maziva (jedini je proizvođač na teritoriji Bosne i Hercegovine).

1.1.1.4. Privredni subjekt „Nestrol Petrol“ a.d. Banja Luka

Privredni subjekt „Nestrol Petrol“ a.d. Banja Luka, Kralja Alfonsa XIII 9, 78000 Banja Luka, je registrovan u Okružnom privrednom sudu Banja Luka (rješenje broj: 071-0-reg-002511 od dana 25. februara 2008. godine) pod matičnim brojem: 1-10073-00, sa osnovnim kapitalom u iznosu od 4.009.274,00 KM.

Pretežna registrovana djelatnost privrednog subjekta „Nestrol Petrol“ je maloprodaja naftnih derivata.

1.2. Privredni subjekt „Naftna industrija Srbije“ a.d.

Privredni subjekt Društvo za istraživanje, proizvodnju, preradu, distribuciju i promet nafte i naftnih derivata i istraživanje i proizvodnju prirodnog gasa „Naftna industrija Srbije“ a.d., Narodnog fronta 12, 21000 Novi Sad, Republika Srbija, je upisan u Registar privrednih subjekata Republike Srbije dana 01. oktobra 2005. godine pod brojem: 20084693, sa osnovnim kapitalom u iznosu od 77.667.960,13 KM (EUR 39.711.000,00).

Pretežna registrovana djelatnost privrednog subjekta NIS je eksploatacija sirove nafte.

Vlasnička struktura privrednog subjekta NIS na dan 22. decembra 2010. godine je slijedeća:

Tabela 1.

R.b.	Privredni subjekt	Udio u %
1.	Otvoreno akcionarko društvo „GASPROM NEFT“ Sant Peterburg, Ruska Federacija	51,00
2.	Republika Srbija	29,8781
3.	Ostali dioničari	19,1219
	UKUPNO	100,00

Izvor: Podaci iz Prijave

Većinski vlasnik privrednog subjekta NIS, privredni subjekat Otvoreno akcionarko društvo „GASPROM NEFT“ Galjernaža 5, 790000 Sant Peterburg, Ruska Federacija, nema 10,0% ili više udjela u osnovnom kapitalu, odnosno 10,0% ili više prava glasa u privrednim subjektima na relevantnom tržištu, niti ostvaruje prihode na tržištu Bosne i Hercegovine.

1.3. Privredni subjekt „Jadran – Naftagas“ d.o.o.

Privredni subjekt „Jadran – Naftagas“ d.o.o. Banja Luka, Ivana Frane Jukića 7, 78000 Banja Luka, je registrovan u Okružnom privrednom sudu Banja Luka pod matičnim brojem: 57-01-0312-10 dana 23. decembra 2010. godine, sa osnovnim kapitalom od 2.000,00 KM, i sa 66,0% vlasničkih udjela privrednog subjekta NeftegazInKor i 34,0% vlasničkih udjela privrednog subjekta NIS.

Pretežne registrovane djelatnosti privrednog subjekta Jadran – Naftagas su istraživanje i proizvodnja nafte i gasa, vađenje sirove nafte i prirodnog gasa, uslužne djelatnosti u vađenju nafte i gasa, ispitivanje terena bušenjem i sondiranjem, iznajmljivanje nekretnina za sopstveni račun, istraživanje i eksperimentalni razvoj u tehničkim i tehnološkim naukama.

2. Obaveza prijave predmetne koncentracije

Obaveza prijave koncentracije privrednih subjekta postoji ukoliko su ispunjeni kumulativni uslovi iz člana 14. stav (1) tačke a) i b) Zakona, tj. ukoliko ukupni godišnji prihod svih učesnika koncentracije ostvaren prodajom roba i/ili usluga na svjetskom tržištu iznosi 100.000.000,00 KM po završnom računu u godini koja je prethodila koncentraciji i ukoliko ukupni godišnji prihodi svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,0%.

Ukupni godišnji prihodi privrednih subjekta učesnika predmetne koncentracije, na dan 31. decembar 2009. godine, iznose:

Tabela 2.

R.b.	Privredni subjekt	Bosna i Hercegovina	Svijet
1.	NIS Novi Sad	(..)** ¹ KM	(..)**KM
2.	NeftegazInKor	(..)**KM	(..)**KM

Izvor: Podaci iz Prijave

Ukupni godišnji prihodi povezanih društava privrednog subjekta NeftegazInKor, na dan 31. decembar 2009. godine:

Tabela 3.

R.b.	Privredni subjekt	Bosna i Hercegovina	Svijet
1.	Optima Grupa d.o.o. Banja Luka	(..)**KM	(..)**KM
2.	Rafinerija nafte a.d. Brod	(..)**KM	/
3.	Rafinerija ulja a.d. Modriča	(..)**KM	(..)**KM
4.	Nestrol Petrol a.d. Banja Luka	(..)**KM	/

Izvor: Podaci iz Prijave

Godišnji prihodi učesnika koncentracije predstavljaju ukupne prihode (bez poreza na dodanu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterija za ocjenu koncentracija privrednih subjekata.

Konkurencijsko vijeće pri računanju ukupnih godišnjih prihoda učesnika koncentracije je koristilo kriterije i standarde Obavijesti Evropske komisije o računanju ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekata.

¹ (..)** podaci predstavljaju poslovnu tajnu

Na osnovu navedenih podataka o ukupnom godišnjem prihodu, u smislu člana 14. stav (1) tačke a) i b) Zakona, utvrđeno je da su učesnici koncentracije obavezni podnijeti Prijavu.

3. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti predmetne koncentracije primijenilo odredbe Zakona, Odluke o utvrđivanju relevantnog tržišta („Službeni glasnik BiH“, br. 18/06 i 34/10), Odluke o definiranju kategorija dominantnog položaja („Službeni glasnik BiH“, br. 18/06 i 34/10), te Odluke o načinu ponošenja prijave i kriterija za ocjenu koncentracije privrednih subjekta.

Također, u postupku Konkurencijsko vijeće je imalo u vidu i odredbe Zakona o rudarstvu Republike Srpske („Službeni glasnik Republike Srpske“, br. 10/95, 18/95, 10/98, 63/02, 69/02 i 86/03) i Zakona o koncesijama Republike Srpske („Službeni glasnik Republike Srpske“, br. 25/02, 91/06 i 92/06).

Konkurencijsko vijeće, u skladu sa članom 43. stav (7) Zakona, pri računanju ukupnih godišnjih prihoda učesnika koncentracije je koristilo kriterije i standarde Obavijesti Evropske komisije o računanju ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekta.

4. Pravni osnov i oblik predmetne koncentracije

U Prijavi je navedeno da je pravni osnov Ugovor o osnivanju privrednog subjekta „Jadran – Naftagas“ d.o.o. zaključen između privrednog subjekta NeftegazInKor i privrednog subjekta NIS, dana 14. decembra 2010. godine.

Konkurencijsko vijeće je prihvatilo Ugovor kao pravni osnov predmetne koncentracije, u smislu člana 16. stav (1) Zakona, a u vezi sa članom 30. stav (1) tačka a) Zakona i članom 9. tačka f) alineja 13. Odluke o načinu podnošenja prijave i kriterijima za ocjenu koncentracije privrednih subjekta.

U skladu sa naprijed navedenim, a na osnovu člana 12. stav (1) tačka c) Zakona, pravni oblik koncentracije jeste zajedničko ulaganje na dugoročnoj osnovi dva nezavisna privredna subjekta u novi nezavisni privredni subjekt.

5. Relevantno tržište predmetne koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda / usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu osobito njihove bitne karakteristike, kvalitetu, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cjelokupan ili značajan dio teritorije Bosne i Hercegovine na kojoj privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Relevantno tržište proizvoda i/ili usluga u konkretnom slučaju predstavlja istraživanje i proizvodnja nafte i gasa, što je osnovna djelatnost novoosnovanog privrednog subjekta Jadran – Naftagas.

Budući da će privredni subjekt Jadran – Naftagas djelovati samo na teritoriji Republike Srpske, relevantno tržište u geografskom smislu je teritorija Republike Srpske.

Slijedom navedenog, pod relevantnim tržištem predmetne koncentracije smatra se tržište istraživanja i proizvodnje nafte i gasa na teritoriji Republike Srpske.

6. Ocjena predmetne koncentracije

Konkurencijsko vijeće je analizom relevantnih podataka ocijenilo da na relevantnom tržištu prije provođenja ove koncentracije nije bilo privrednih subjekata koji su djelovali na tržištu istraživanja i proizvodnje nafte i gasa na teritoriji Republike Srpske (što potvrđuje i akt Ministarstva industrije, energetike i rudarstva Republike Srpske broj: 05.06./312-28/11 od dana 08.03.2011. godine) i da ova koncentracija predstavlja otvaranje istoga.

Konkurencijsko vijeće je pri analizi predmetne koncentracije u obzir uzelo i član 14. Zakona o rudarstvu Republike Srpske, kojim je utvrđeno da eksploataciju mineralnih sirovina može vršiti preduzeće koje ispunjava zakonom propisane uslove, te da pravo vršenja eksploatacije mineralnih sirovina preduzeće stiče u skladu sa Zakonom o koncesijama Republike Srpske (članom 28. je utvrđeno da se ugovor o koncesiji zaključuje na određeni period koji ne može biti duži od 30 godina, odnosno ne može biti duži od 50 godina u posebnim slučajevima). Također, privredni subjekt koji vrši eksploataciju treba da dobije i odobrenje Ministarstva industrije, energetike i rudarstva Republike Srpske.

Konkurencijsko vijeće analizom relevantnih podataka, u smislu člana 17. Zakona, je ocijenilo da će predmetna koncentracija imati određene dugoročne pozitivne ekonomske efekte za tržište Bosne i Hercegovine u smislu smanjenja zavisnosti od uvoz nafte, a što će imati i efekat na ekonomiju, kao i tehnički i ekonomski razvoj relevantnog tržišta.

Također, Konkurencijsko vijeće uzelo u obzir i aktivnosti Vlade Republike Srpske u daljem otvaranju tržišta istraživanja i proizvodnje nafte i gasa i namjeri da i drugim privrednim subjektima dodjeli koncesiju što će obezbijediti jačanje tržišne konkurencije.

Konkurencijsko vijeće je ocijenilo dopuštenom predmetnu koncentraciju, u smislu člana 18. stav (2) tačka a) Zakona.

7. Novčana kazna

U postupku provjere podataka o predmetnoj koncentraciji dostavljenih u Prijavi traženi su podaci od nadležnih institucija Republike Srpske. Konkurencijsko vijeće je uputilo Zahtjev Okružnom privrednom sudu Banja Luka, Gundulićeva 108, 78000 Banja Luka, za dostavom podataka iz sudskog registra za privredni subjekt Jadran Naftagas d.o.o. Banja Luka, aktom broj: 02-26-1-031-17-II/10 od dana 27. aprila 2011. godine.

Okružni privredni sud Banja Luka je dostavio tražene podatke, podneskom broj: Reg-R-963/11 dana 03. maja 2011. godine (zaprimljen pod brojem: 02-26-1-031-18-II/10 dana 09. maja 2011. godine).

Uvidom u dostavljeni Izvod iz sudskog registra, Konkurencijsko vijeće je utvrdilo da je privredni subjekt „Jadran – Naftagas“ društvo sa ograničenom odgovornošću Banja Luka, Ivana Franje Jukića 7, 78000 Banja Luka registrovano dana 23. decembra 2010. godine pod

matičnim brojem: 57-01-0312-10, na osnovu Ugovora o osnivanju broj: OPU 1795/10 od dana 14. decembra 2010. godine, od strane privrednih subjekta Otvoreno akcionarsko društvo „Neftegazojava Innovacionnaja Korporacija“, Kalančevskaja ulica broj 11, zgrada 2, 107078 Moskva, Ruska Federacija (34,0% vlasničkih udjela) i Društvo za istraživanje, proizvodnju, preradu, distribuciju i promet nafte i naftnih derivata i proizvodnju prirodnog gasa „Naftna industija Srbije“ a.d., Narodnog Fronta 12, 21000 Novi Sad, Republika Srbija (66,0% vlasničkih udjela).

Iz navedenog jasno proizilazi da su Podnosioci prijave proveli koncentraciju bez prethodnog rješenja Konkurencijskog vijeća, u smislu člana 18. stav (9) Zakona, kojim se potvrđuje usklađenost predmetne koncentracije iz čl. 12. i 14. Zakona.

U skladu sa članom 48. stav (1) tačka e) Zakona, Konkurencijsko vijeće izriče novčanu kaznu u iznosu najviše do 10% vrijednosti ukupnog godišnjeg prihoda iz godine koja je prethodila koncentraciji, privrednom subjektu koji provede koncentraciju bez prethodnog rješenja o koncentraciji, u smislu člana 18. stav (9) Zakona.

Također, u smislu člana 52. Zakona, Konkurencijsko vijeće prilikom određivanja visine novčane kazne uzima u obzir namjeru i trajanje povrede Zakona.

Konkurencijsko vijeće je odredilo visinu novčane kazne imajući u vidu činjenicu da kažnjavanje privrednog subjekta NeftegazInKor“ i privrednog subjekta NIS“ nije prvenstveni cilj, već da izrečena novčana kazna ima za svrhu upozoriti na obaveznu primjenu Zakona.

Konkurencijsko vijeće je uzelo u obzir da se u konkretnom slučaju ne radi o nekim strankama, nego o strankama koje su već sudjelovale u postupcima ocjene koncentracije pred Konkurencijskim vijećem, te su upoznate sa odredbama Zakona, a to se posebno odnosi na privredni subjekt NeftegazInKor, i njegova povezana društva, koji je već ranije podnosio prijave koncentracije (zaključci Konkurencijskog vijeća broj: 01-04-26-008-9-II/07 od dana 23. maja 2007. godine, broj: 01-02-26-009-7-II/07 od dana 23. maja 2007. godine i broj: 01-01-26-007-26-II/07 od dana 23. maja 2007. godine i rješenje broj: 01-05-26-033-22-II/09 od dana 23. marta 2010. godine).

Konkurencijsko vijeće je također cijenilo činjenicu da su Podnosioci prijave u zakonskom roku prijavili koncentraciju, te da su u postupku ocjene koncentracije saradivali i u ostavljenim rokovima dostavljali svu traženu relevantnu dokumentaciju i podatke.

Također, Konkurencijsko vijeće je uzelo u obzir činjenicu da na relevantnom tržištu istraživanja i proizvodnje nafte i gasa na teritoriji Republike Srpske prije provođenja ove koncentracije nije bilo privrednih subjekata, te da ova koncentracija predstavlja otvaranje istoga i doprinosi razvoju tržišta.

Na osnovu navedenog Konkurencijsko vijeće je privrednom subjektu „NeftegazInKor“ i privrednom subjektu „NIS“ izreklo novčanu kaznu u ukupnom iznosu od 70.000,00 KM (sedamdeset hiljada), odnosno (..)**% ukupnog ostvarenog prihoda učesnika koncentracije iz 2009. godine (Tabele 2. i 3.).

Novčanu kaznu iz stava (2) dispozitiva Rješenja platit će privredni subjekt „Jadran – Naftagas“ d.o.o. za istraživanje i proizvodnju nafte i gasa, Ivana Frane Jukića 7, 78000 Banja Luka ili povezana privredna društva učesnika koncentracije u Bosni i Hercegovini – privredni subjekt “Optima Grupa” d.o.o. Banja Luka, Kralja Alfonsa XIII 37A, 78000 Banja Luka, privredni subjekt „Rafinerija nafte“ a.d. Brod, Svetog Save bb, 74450 Brod, privredni subjekt „Rafinerija ulja Modriča“ a.d. Modriča, Vojvode Stepe Stepanovića 49, 74480 Modriča,

privredni subjekt „Nestrol Petrol“ a.d. Banja Luka, Kralja Alfonska XIII 9, 78000 Banja Luka.

U slučaju da Podnosioci prijave ne izvrše uplatu novčane kazne u utvrđenom roku Konkurencijsko vijeće će zatražiti od relevantnih tijela prinudno izvršenje iste, te obračunati zateznu kamatu za vrijeme prekoračenja roka uplate novčane kazne, u skladu sa propisima Bosne i Hercegovine.

Slijedom navedenog Konkurencijsko vijeće je odlučilo kao u tački (2) i (3) dispozitiva ovog Rješenja.

8. Administrativna taksa

Podnosioci prijave na ovo Rješenje, u skladu sa članom 2. stav (1) tarifni broj 107. tačka d) pod 1) Odluke o administrativnim taksama u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11) su dužni platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

9. Pouka o pravnom lijeku

Protiv ovog Rješenja nije dozvoljena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Rješenja.

Predsjednik

dr. Stjepo Pranjić